

KINUTLO GIKAN SA SULAT NI SAN DABLO NGADTO SA MGA HEBREO

Heb. 4: 12-13

Ang pulong sa Dios buhi ug gamhanan ug mas hait pa kay sa bisan unsng espada nga duhay suwab. Modulot kini hangtod sa kinahiladman sa kalag ug sa espiritu, hangtod sa dapit diin nag-abot ang lutahan ug ang kauyokan. Nag-usisa kini sa mga tinguha ug hunahuna sa kasingkasing sa mga tawo. Walay butang matago gikan sa Dios. Ang tanan dayag ug makita sa iyang mga mata ug kitang tanan maghatag kaniyang husay sa atong binuhatan.

PULONG SA GINOO.
SALAMAT SA DIOS.

ALELUYA.

Aleluya. Sulti, Ginoo, kay namati ang imong sulugoon; anaa kanimo ang mga pulong sa kinabuhing walay katapusan.
Aleluya.

KINUTLO GIKAN SA EBANGHELYO SUMALA NI SAN MARCOS

Mk. 10: 17-30

Sa diha nga molakat na unta si Jesus, may tawo nga midagan ngadto kaniya, miluhod sa iyang atubangan, ug nangutana, "Maayong Magtutudlo, unsa may kinahanglan kong buhaton aron madawat ko ang kinabuhing dayon?"



Nangutana si Jesus kaniya, "Nganong miingon ka man nga ako maayo? Walay maayo gawas sa Dios. Nahibalo ka sa mga sugo: 'Ayaw pagpatay; ayaw panapaw; ayaw pangawat; ayaw pamakak; ayaw panlimbong; tahora ang imong amahan ug inahan.'"

Mitubag ang tawo, "Magtutudlo, nagtuman ako niining tanang sugo sukad pa sa akong pagkabatan-on."

Mahigugmaon si Jesus nga mitutok kaniya ug namulong, "Usa ra ka butang ang kinahanglan mong buhaton. Lakat ug ibaligya ang tanan mong katigayonan ug ihatag ang halin ngadto sa mga kabus, ug maangkon mo ang mga bahandi sa langit; unya balik nganhi ug sunod kanako." Sa pagkadungog sa tawo niini, naguol siya ug masulob-ong mibiya kang Jesus, tungod kay dato man siya kaayo.

Milingi-lingi si Jesus sa iyang mga tinun-an ug miingon kanila, "Pagkalisod gayod sa mga dato ang pagsulod sa Ginharian sa Dios!"

Nakugang ang mga tinun-an sa pagkabati nila niini, apan mipadayon si Jesus pagsulti, "Mga anak, pagkalisod gayod ang pagsulod sa Ginharian sa Dios! Mas lisod pa sa usa ka dato ang pagsulod sa Ginharian sa Dios, kay sa usa ka kamelyo paglusot sa lungag sa dagom."

Nahibulong pag-ayo niini ang mga tinun-an ug nagpangutan-anay, "Kon mao kana, kinsa ra man diay ang maluwas?"

Mitutok si Jesus kanila ug mitubag, "Dili kini mahimo

sa tawo, apan mahimo sa Dios; kay ang tanan mahimo gayod sa Dios."

Unya misulti si Pedro, "Nasayod ka nga gibiyaan namo ang tanan ug misunod kami kanimo."

Miingon si Jesus kanila, "Tinuod kana, ug sultihan ko kamo nga ang mobiya sa iyang panimalay o sa mga igsoon, o sa inahan, o sa amahan, o sa mga anak, o sa mga uma tungod kanako ug tungod sa Maayong Balita, makadawat ug labi pang daghan niining kinabuhia. Makadawat siyag ginatos ka mga balay, mga igsoon, mga inahan, mga anak, ug mga uma bisan tuod og lutoson siya; ug sa umaabot nga kalibutan makadawat siya sa kinabuhing dayon."

ANG EBANGHELYO SA GINOO.
DAYGON IKAW, O CRISTO.

MGA PAG-AMPO SA KATAWHAN

P. Mag-ampo kita ngadto sa Dios alang sa kaalam sa pag-ila sa iyang mga gasa uban sa pasalamat ug sa paggamit kanila alang sa kaayohan sa tanan. Mag-ampo kita sa pag-ingon:

T. GINOO, HIMOA KAM ING MAALAM ON UBAN SA IMONG KAALAM .

1. Alang niadtong anaa sa Simbahan nga nagbutyag kanato sa kaalam sa Pulong sa Dios, nga sila usab magpuyo niini ug mopaambit sa ilang mga kasinatian nganhi kanato, mag-ampo kita:
2. Alang sa mga pamunoan sa tanang dapit, nga dili nila ilisan ang ilang mga prinsipyo sa gahum, kalampusan ug ambisyon apan motahan sa ilang kaugalingon alang sa pagpalambo sa bili sa Ebanghelyo, mag-ampo kita:
3. Alang niadtong nahilambigit sa kahimanan sa komunikasyon, sa radyo, sa telebisyon ug mga pamantalaan, nga dili nila usabon ang mga pulong ug mga hulagway aron pagguba sa mga bili sa kinabuhi hinoon matinud-anon sa pagpangita sa kamatuoran, mag-ampo kita:
4. Alang kanatong tanan nga ania karon, nga uban kang P. _____ maghagit kita sa mga katawhan sa pagkinabuhi alang sa mga butang nga labing mahinungdanon labi na piaagi sa *Gagmayng Simbahanong Katilingban* o *GSK*, mag-ampo kita:
5. Alang sa mga kabatan-onan sa atong diyosesis, nga ang ilang panglantaw ug kamanggihatagon maoy mag-agak sa ilang kinabuhi samtang naghulat kita sa pag-abot sa atong Obispo, mag-ampo kita:
6. Alang sa tanang mga kalag sa atong mga igsuong namatay, nga ilang madawat ang malungtarong kaalam sa Dios didto sa langit, mag-ampo kita:
7. Alang sa atong mga kaugalingong katuyoan sulod niining Santos nga Misa, nga sa higayon nga ang Ginoo mopanalangin kanila makakat-on kita sa pagpaambit niadtong mga nagkinahanglan samtang ampoan nato sila sa kahilom (*diyutayng kahilom*), mag-ampo kita:

P. Dios, nag-ampo kami kanimo dili alang sa kadato kondili alang sa pagsalig, dili alang sa gahum kondili alang sa kadasig, dili aron magpakaaron-ingnon kondili alang sa integridad. Himoa kaming maalamon uban sa kaalam ni Jesuskristo among Ginoo. *Amen.*